



UPA 2016/046-01

04.05.2016

Meeqqat atuarfianni atuartut akulliit ilinniarnissamut periarfissat assigiinngitsut qanoq atorneqarnissaannut atuartut ilisimasaasa annertusarnissaat siunertaralugu immikkut ittumik siunnersuinissat aallartinneqarnissaat aallartinniarlugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliniutissaq ukioq 2017-imi aallartinneqassaaq, paasisassarsiorlunilu angalanissanut, suliffeqarfinnut alakkarterinissanut suliffeqarfefarfillu pillugu ilinniartitsinernut immikkut aaqqissukkanut aningaasanik kommuninit qinnuteqarfingineqarsinnaasunik pilersitsinissaq aaqqissorneqassalluni.

(Inatsisartunut Ilasortaq Naaja H. Nathanielsen, Attaviitsoq)

Inatsisartunut Ilasortaq Naaja H. Nathanielsenip siunnersuutaa, tassa meeqqat atuarfianni atuartut akulliit ilinniarnissamut periarfissat assigiinngitsut qanoq atorneqarnissaannut atuartut ilisimasaasa annertusarnissaat siunertaralugu immikkut ittumik siunnersuinissat aallartinneqarnissaat aallartinniarlugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suliniutissaq ukioq 2017-imi aallartinneqassaaq, paasisassarsiorlunilu angalanissanut, suliffeqarfinnut alakkarterinissanut suliffeqarfefarfillu pillugu ilinniartitsinernut immikkut aaqqissukkanut aningaasanik kommuninit qinnuteqarfingineqarsinnaasunik pilersitsinissap aaqqissorneqassanut tunngasoq Partii Naleqqamiit imannak oqaaseqarfingissuarput.

Siunnersuut pissanganartoq soqtiginartorlu saqqummiunneqarmat qujanaq.

Siunnersuuteqartoq ilumoorluinnarpoq, ullumikkut inuusuttu meeqqat atuarfianniit anisartut ilinniakkamik suliffissamilluunniit aallartitsinngitsoortartut amerlavallaarujuussuartut.

Aamma aappaatigut Naalakkersuisut akissuteqarnerminni ilumoorput, meeqqat atuarfianniit anisartut, ilinniarfinnullu allanut imaluunniit suliffeqalernissamut ikaarsaanngitsoortartut amerlavallaarujuussuarput.

Tassami meeqqat atuarfiini nutaamik eqqarsarluni aaqqissusseqqinnissaq pisariaqarsorinarpog. Isumaqarpungut taamaaliornissamut ilaatigut ilinniartitsisut, tiimip ilinniartitsiffiusup aallartinneri tamarluinnangajaasa perorsaanermut naalatitsiniarnermullu tunngasunik ilinniartitsisut piffissarujussuarmik atuisarnerat aallarniutitut iliuuseqarfingissallugu avaqqukkuminaatsoq.

Isumaqarpugut atuarfinni ilinniartitsisut perorsaasunik ikiorserneqartariaqartut.

Aamma meeqqat pikkorissut, atuartitaanermullu malinnaalluartut immikkut ingerlalluaannarsinnaanerminnut periarfissinneqartariaqartut, tassami tusartaannarparput, atuartut pikkorissut malinnaaluartullu, uninngatinneqartariaqartartut, atuaqatit ilaat malinnaalluanngitsut angummatinniarlugit.

Aap, atuartut ilaat angummanniarnermik ajornartorsiutillit ikiorserneqassapput aamma malinnaatinneqassapput. Kisianni atuartut malinnaalluartut angusaqarluarusuttullu uninngatinneqartarerat allaanerusumik aaqqissuussinikkut periarfissinneqartariaqartoq isumaqarpugut, tassami atuartut tamaasa annaasaqaataanngitsumik ingerlalluarnissaat pisariaqartipparput.

Kissaatiginerpaasarput, tassaavoq atuartut imminnut akornusersuunnertaqanngitsumik ingerlalluarnissaat.

Aap, Ilisimatusarfimmi ilinniartitsisunngorniartarnerup nalilersorneqarnerani inerniliinerit tusarpavut, tassagooq, ilinniartitsisut ilinniarnerisa pitsaassusaat annertuunik ajornartorsiuteqarfiummat, soorlu Naalakkersuisut aamma akissuteqarnerminni taama oqartut.

Isumaqarpugut ilinniartitsisut, meeqqat atuarfiata ingerlanerliorneranut kisimik pisuutinneqarsinnaanngitsut. Angajoqqaajusugut angajoqqaatut akisussaaffik annerpaat tigummivarput.

Tassami ilinniartitsisut kattuffiata, ilinniartitsisullu nalunaarutigisartagaat, tusarnaartarsimangaanni, ilinniartitsisut tiimit atuartitsiviusut aallartinneri tamaasa meeqqanik naalatitsiniarnermut piffissarujussuaq atortaraat takuneqarsinnaammatt.

Taamaattumik Naalakkersuisut meeqqat amerlasuut atuarfimmiit sumiginnarneqartarnerannik saqqummiussaqarnerat, ilinniartitsisunik pisuutitsiniarnerinnartut nalilertariaqarparput.

Taamaattorli aamma Naalakkersuisut, ilinniartitsisunut meeqqat atuarfiini sulisooreersunut perorsaanikkut siunnerfilimmik piginnaanngorsaasoqarnissaanik anguniagaqalerterat tamakkiisumik taperserparput.

Taama oqareerluta inatsisartunut ilaasortap Naaja H. Nathanielsen siunnersuutaa aamma avaqqukkuminaattorujussusoq takusinnaavarput, naak maannamut meeqqat angajulliunerusut namminneq, ilinniartitsisutik, angajoqqaatillu suleqatigalugit, paasisassarsiorluni angalasarternut katersinermikkut angalanerit piviusunngortittaraluaraat.

Isumarpugut meeqqat siunissami sumi sulilersinnaanermut soqtiginninnerulernissaat siunertaralugu, siunnersuuteqartutuut, akullerni atuartut paasisassarsiorluni angalasinnaanernut periarfissinneqarsinnaanerat soqtiginartoq.

Nalunngilarput taamaaliortoqassappat tamanna aningaasarpassuarnik naleqassasoq. Taamaammat Naalakkersuisut ilaatigut Air Greenland-imik, Kanukokami allanillu soqtigisaqartunik attaveqalersimanerat iluaraarput taperserlugulu.

Isumaqpugut maannamut meeqqat nammineerlutik, ilinniartitsisut angajoqqaallu peqatigalugit paasisassarsiorluni angalanissanut katersisarnerat tapersorsorujussuarneqartariaqartoq, taakkulu katersisut Namminersorlutik Oqartussaniit tapiiffiqineqarsinnaanerat periarfissanut ilaatinneqartariaqartoq, tassa suna tamaat tunniutiinnarnagu, kisianni sulinerup kingunerisaanik angusat taperserneqarnissaat pingaartillugu iliuuseqartoqartariaqartoq isumaqpugut.

Naalakkersuisut allannguutissatut siunnersuutaat, immaqa aamma ataatsimiititaliamit allanngortinneqalaarsinnaassoq, imaalillugu – meeqqat nammineerlutik, ilinniartitsisut angajoqqaallu peqatigalugit, paasisassarsiorluni angalanissamut aningaasannanniartarnerat attatiinnarlugu, taakku nammineersinnaanerat ataqqillugu, kisianni tapiiffiqineqarsinnaanerat periarfissinneqassasoq kaammattuutingaarput, tassa meeqqat aamma isumaqalersinneqassangimmata, suut tamarmik akeqanngitsumik tapiissutaannarnillu pineqarsinnaasut.

Taama oqaaseqarluta siunnersuut Naalakkersuisullu suliniutaat tassunga tunngasut taperserlugit suliap aappassaanneerdeqannginnerani Ilinniartitaanermut, Kulturimut ilageeqarnermullu ataatsimiititaliami suliarineqarnissaat inassusingaarput.